

國朝先正事略

國朝先正事略卷之二十八 名儒

平江李元度次青纂

陳確菴先生事略

先生諱瑚字言夏號確菴江蘇太倉人明季爲諸生與同里陸桴亭先生講明義理經濟之學桴亭作格致編首提敬天二字以證千聖心法先生由此用力深得要領著聖學入門書分小學爲六曰入孝曰出弟曰謹行曰信言曰親愛曰學文分大學爲六曰格致曰誠意曰正心曰修身曰齊家曰治平小學先行後知大學先知後行小學之終卽大學之始而每日課程卽以敬怠善過自考又以全史浩繁難讀乃編爲四大部以政事人

文別之政。部分曹事。部分代人。部分類文。部分體手。書巨帙各數十略。能背誦。又旁通當世之務。河漕農田水利兵法陣圖。無不研貫。暇則橫槊舞劍。彎弓注矢。擊刺妙天下。崇禎壬午舉於鄉。赴禮部試。不第歸。時婁江湮塞。水旱洊至。民大饑。先生上當事救荒書。其預備之政四。曰築圍岸。開港浦。廣樹藝。豫積儲。防挽之政四。曰慎災眚。早奏報。懲游惰。勸節省。補苴之政四。曰通商。勸分。興役。弭亂。軫恤之政四。曰招流亡。緩征索。審刑獄。恤病囚。又陳支吾三議。其議食四條。曰勸義助。勤轉輸。招商米。優米肆。議兵八條。曰嚴保甲。練鄉民。設偵探。勸習射。練夫役。練牙兵。備城守之人。備城守之器。議信六條。曰勵士節。和大戶。巡郊野。

安典肆清獄囚。嚴督察。又上巡撫王開江書。一審勢。二經費。三役兵。四實法。皆精切可施行。而時不能用。自言其學如醫之治病。求之於古。猶治方藥也。求之於今。猶切脈也。按脈以求病。按病以定方。按方以用藥。故百發不爽。然主人諱疾。則良醫亦束手矣。明亡後。絕意仕進。父病。刺血書疏。籲天乞身代父卒。遺孀悉讓之弟。避兵行。遯不交人事。嘗寓崑山之蔚村。村田沮洳。導里人築圍岸禦水。用兵家束伍法。不日而成。至今賴之。晚益困。翼常至絕食。終不肯干人。嘗初冬驟寒。客有重裘者。知先生單絺。欲解以贈。竟夕不敢言。退而曰。乃知今世復有陳無已也。康熙十四年卒。年六十有三。先生之學博大精深。以經世自任。其

論學有曰國家之盛衰視人才之消長人才之消長視教化之興廢教化興廢之關人心生死之會也人心不死則天命流行而乾坤立人心死則天命不行而乾坤亦幾乎毀矣治亂之故豈非人心爲之哉其論日省敬怠曰君子莊敬日強安肆日偷小學不由乎敬則無以涵養乎本原而謹乎洒掃應對之節與詩書六藝之教大學不由乎敬則無以開發聰明進修德業而致明德新民之功敬也者聖學之所以成始而成終也有內敬主一無適是也有外敬整齊嚴肅是也有靜時之敬戒愼不睹恐懼不聞是也有動時之敬喜怒哀樂發皆中節是也有一日之敬終日乾乾夕惕若是也有一息之敬終食之間不違仁是

也有統體之敬。欽明恭已。聖敬日濟。緝熙敬止。是也有物。物之敬。手容恭。足容重。非禮勿視聽。非禮勿言動。是也。故容有善而未必敬者矣。未有敬而不善者也。其論理財曰。管子富國之法。大約籠山澤之利。操輕重之權。在上不在下。使富商大賈無所牟利。桑孔之徒。師其意。以爲均輸平準之法。而不知其合變何也。管子霸道也可施之一國。不可施之天下。苟利吾國。鄰國雖害。不恤也。爲天下則不然。此有餘。彼不足。不足者亦王土也。此享其利。彼受其弊。弊者亦王民也。故桑孔用之漢。而耗王呂用之宋。而亡其論申韓曰。申韓刑名之學。刑者形也。其法在審合形名。故曰。不知其名。復修其形。形名參同。用其所生。又曰。君操

其名臣效其形。形名參同。上下和調。蓋循名責實之謂。今直以爲刑法之刑過矣。所著書自聖學入門外。有蔚村講規。社學事宜。開江築圍書。菊窓隨筆。荒政全書。今不傳。

高箕旃先生事略

高愈 汪燧

顧樞 張夏

劉灼 嚴夢

吳旗

施璜

高先生世泰字箕旃無錫人忠憲公璆龍從子也少侍忠憲講席篤守家學晚年以東林先緒爲己在葦道南祠麗澤堂於梁溪與高紫超等講習其中祁州刁先生包往返論學尤莫逆學者有南梁北祁之稱孝感熊文端出先生門下儀封張清恪平湖陸清獻亦常與東林講會歟人汪學聖者所學近禪旣至東林乃大悟前失其同鄉吳慎施璜汪燧汪知默陳二典胡鼎江佑朱宏輩方講朱子之學於紫陽書院因學聖以問業東林志相得乃作紫陽通志錄紫超名愈忠憲公兄孫也十歲讀忠憲遺書卽知向學旣壯補諸生日誦遺經及先儒語錄謹言行植

身艱苦嘗言士求自立當自不忘溝壑始事親孝父晉侯嗜酒食必具酒肉出就人飲每遣僮往候而已屏立路旁俟與主人別則趨而掖以歸以爲常先後居親喪不飲酒食肉不內寢兩兄皆前卒撫其孤子女爲之昏嫁晚年益窮困嘗餒粥七日矣方絜其子登城眺望意充然樂也張清恪撫蘇時延主東林書院講會以疾辭有司饋之人復不受平居體安氣和雖子弟未嘗訶譟終日危坐不欠伸盛暑不裸跣與人食不越簋下箸有忿爭者至其前輒愧悔縣人好以道學相詆譏獨至先生前曰君子人也卒年七十有八生平於取與之介最嚴年七十時門弟子製冠爲壽猶卻之願棟高嘗從先生遊說經娓娓忘倦所

撰朱子小學注。乾隆中尹學使會一以小學取士。頒行其書。又著周易偶存。春秋經傳日抄。春秋類春秋疑義。儀禮喪服或問。周禮疏義諸書。東林爲高忠憲顧端文兩公講學地。得諸君恪守遺規。其緒言益不泯於世。同縣顧樞字所止。一字庸庵。端文公憲成孫也。明天啟中舉人。少從忠憲講。朱子之學入。國朝韜形遁迹。不入城市。不赴講會。惟心體力行而已。淹貫五經。尤深於周易。尙書晚作易稿。折衷至當。嘗曰。吾祖於易最精。獨無著述。小子可妄穿鑿乎。於明儒服膺薛胡。而謂陳王不免差失。又謂端文主無欲。忠憲主格物。並直接宋儒。其議論之醇正可知矣。同時山陰劉念臺先生之子。洵字伯繩。亦以清介力學稱。

方念臺先生家居講學時諸弟子聞教未達多私於伯繩。伯繩應機開譬聞者莫不灑然。及先生死國難明唐魯二王皆遣使祭。且蔭以官。伯繩皆辭之曰。父死敢因爲利。旣葬杜門絕人事。著禮經考次一書以竟父業。有司或請見。雖通家故舊亦峻拒之。副使王爾祿故念臺門下士。以金三百請刻公遺書。不受。語使者曰。幸爲我辭。大夫出處殊途。無相強居。蔽山小樓二十年。所與接惟史子虛。憚仲升輩數人耳。或勸舉講會。不應。臨卒戒其子曰。若等安貧讀書。守人譜以終身足矣。人譜者。念臺所著書也。所臥榻假之祁氏。病革強起易之曰。吾豈可終於祁氏之榻門人私謚曰貞孝先生。吳慎字徽仲歛諸生也。於書無所不

讀而尤盡心於朱五子書著書三十餘種其行世者有周易粹
言大學中庸章句翼論學以敬爲主自號曰敬庵初遊梁谿時
東林書院尙守忠憲家法徽仲與其州人施虹玉無錫張秋紹
等同受業高秉旃先生春秋釋奠畢升堂開講威儀秩然見者
莫不歛容傾聽也已而歸歛會講紫陽還古兩書院興起者眾
施虹玉名璜休甯人少應郡試見鄉先生講學紫陽瞿然曰學
者當如是矣遂棄舉業發憤自力於躬行每會講先一日齋宿
務設誠以感人教學者以九容養外九思養內已而遊梁谿事
高先生將歸與高先生期某年月日當赴講及期高先生設榻
以待或曰千里之期能必信乎高先生曰施生篤行君子也如

不信者。吾不復交天下士矣。言未既。虹玉挈其子僧囊至矣。著
思誠錄小學近思錄發明行於世。汪燧字文儀。居徽之金城里。
年十六。卽手錄先儒書。昕夕觀省。旣長。篤於躬行。一言動必秉
成法。所著書甚具一。以洛閩爲宗。其讀易質疑。尤見推於時。卒
年七十有四。張夏字秋紹。無錫人。隱居菰川之上。孝友力學。初
受業馬文肅公。世奇之。門已而入東林書院。其爲學先經後史。
博覽強記。而歸本自治。高先生旣歿。推秋紹主講席。湯文正公
撫江蘇。與秋紹論學。躋之延至蘇州學宮。講孝經小學。退而著
孝經解義。小學瀚注。及洛閩源流錄。年八十餘卒。又嚴先生穀
者。字佩之。號生軒。亦無錫人家。貧屏跡不出。性孝友。篤學好古。

經史百家靡不究。尤潛心於易春秋。嘗課其弟穀曰。讀書以明道也。吾自得高子遺書。所學乃有歸宿。既與同志講道東林。高君彙旃推爲主席。重修道南祠。輯忠憲年譜。高子節要東林書院志。諸書學使慕其名。貽以額曰。力扶正學。終不一報謁也。著有生軒易說。易同春秋論。春秋集說。尙書講義。四書講義。生軒存稿。以布衣終。

沈求如先生事略

史孝威
邵廷采

管宗聖
王朝式

韓當

邵曾可

有明餘姚王文成公講致良知之學弟子遍天下後或不軌師說爲訛議於世而同邑傳其學者推徐曰仁愛錢緒山德洪胡今山瀚聞人邦正詮再傳而得沈先生國模國模字求如餘姚諸生少以明道爲己任嘗從蕺山劉子會講證人社歸闕姚江書院與史子虛管霞標輩申明良知之說其所學或以爲近禪而言行敦潔較然不欺其志故推醕儒明亡聞劉子絕粒死哭之慟已而講學益勤初山陰祁忠敏公彪佳與先生善忠敏以御史出按江東一日杖殺巨憝數人會先生至欣然以告先生字祁曰世培亦會聞曾子云哀矜弗喜乎忠敏後嘗語人吾每

國朝志卷之二十一
慮。四。必。念。求。如。恐。倉。卒。喜。怒。過。當。也。順。治。十。三。年。卒。年。八。十。有。二。子。虛。名。孝。咸。餘。姚。人。繼。求。如。先。生。主。姚。江。書。院。嘗。曰。空。談。易。對。境。難。於。居。處。恭。執。事。敬。與。人。忠。三。語。精。察。而。力。行。之。其。庶。幾乎。家。貧。日。食。一。粥。泊。如。也。酷。潔。之。士。多。歸。之。卒。年。七。十。有。八。順。治。十。六。年。也。管。霞。標。者。名。宗。聖。亦。餘。姚。人。爲。人。孝。友。忠。亮。彊。氣。自。克。言。動。必。準。於。禮。鄉。人。化。之。孫。少。保。鎮。始。與。霞。標。爲。文。字。交。既。從。講。聖。學。喟。然。嘆。曰。向。嗜。讀。左。國。秦。漢。百。家。書。先。生。爲。我。洗。盡。矣。鎮。世。所。稱。月。峯。先。生。也。自。沈。史。効。後。書。院。較。講。垂。十。年。而。縣。人。韓。仁。父。繼。之。仁。父。名。當。求。如。弟。子。也。其。學。兼。綜。諸。儒。以。名。教。經。世。兢兢。儒。佛。之。辨。居。貧。未。嘗。向。人。稱。貸。每。言。立。身。必。自。節。

用始出陸梭山居家制用篇授學者曰能仿此亦自足用何更
外求爲臨講必默對良久始發語聞者輒內愧汗下退而相語
曰比從韓先生來不覺自失時又有邵曾可者字子唯性孝友
愷悌少頗好書畫一日讀孟子至伯夷聖之清者也遂渙然釋
去姚江書院之立也人頗迂笑之子唯厲色曰不如是便虛度
此生遂往學同儕請業者多辨難子唯獨默然竟曰初以主敬
爲學後專提致知師事子虛甚謹晨走十餘里叩牀下問疾不
食而反月餘亦病同人推其誠篤卒年五十有一子唯生貞顯
字鶴閒鶴閒生廷采字允斯又字念魯學者稱念魯先生九歲
讀史卽操槧爲徐達常遇春傳有法祖自外歸偶舉宋儒語語

之念魯興曰其人安往邪願得而事之祖以爲有志卽爲具衣冠送之姚江書院是時求如先生年八十矣歲必一再至書院爲諸生設講念魯立階下聽久之執卷請曰孩提不學不慮堯舜不思不勉同乎求如漢曰孺子知良知矣能敬以恕吾何加焉自是從韓先生孔當受業初讀傳習錄無所得旣讀劉公念臺人譜曰善哉吾知學王氏學者所始事矣年二十爲縣學生恥爲應舉之文人則讀古書出則古衣冠行市中未嘗旁視居喪不作佛事營窀穸必誠必信一慟盡哀當是時書院諸先生相次歿念魯抱遺書於荒江斥海之濱守其師說不變然貧無以自存走嘉興課童子自給居數年有施博者與論學於放鶴

洲念魯曰天泉四言陽明本無極之說儒也龍溪浸淫無生之旨釋也不得以彼病此博肅拜曰博老矣惟吾子崇尚正學幸自愛。茲吾李剛主貽書論明儒同異念魯答曰致良知者主誠意陽明而後願學戴山其自信如此初宛平孫侍郎承澤孝感熊相國賜履先後以聞王氏學爲已任朝野之士譁然從之念魯曰是不足與辨願在力行耳嘗從同縣黃先生宗羲問乾鑿度算法會稽董先生瑒受陣圖保定王先生正中學西歷施將軍琅征臺灣遇念魯於西湖縱談沿海要害施奇之請與俱不赴閒遊鎮江與梁總兵化鳳講擊刺之法一月而盡之淮安從防河卒問河淮離合狀北訪黃河故道西走潼關喟然曰土則

古所耕也。而水利亡矣。奈何。會邑人修復姚江書院。用禮幣致之。先一日戒眾厥明。諸子及地方吏畢至。釋菜於先賢如禮。出卽講堂。南向坐。童子歌詩。闕爲講易艮卦。聞者肅然。父老皆喜。曰。數十年。今見此也。尋遊京師。商邱宋至。鄞萬經欲招入一統志館。念魯謝曰。老矣。遂歸。康熙五十年卒。年六十有四。先生貌豐目有光。紵袍布履。門庭潔如。居家必正坐。酒酣談忠孝事。人感動。平生篤於三黨。養老姑終其身。館陶家堰時。隣婦訕聲數出於柵。聞邵先生過。輒止。一年而改行。鄉里童子遭於道。必拱手立。然俗士輒貌敬之。而迂先生莫肯傳其學。旣倦遊。無所遇。私念師友淵源。思及身而斬也。乃思託著述以自見。以爲陽

明扶世翼教。作王子傳。蕺山功主慎。忠清堅苦。作劉子傳。王學
盛行。務使合於矩準。作王門弟子傳。金鉉。祁彪佳。黃宗羲。張兆
麟等。奉教守師說。作劉門弟子傳。又作宋明遺民所知傳。姚江
書院傳。及倪文正施忠愍諸傳。門人刻其遺文。爲思復堂集。二
十卷。又姚江書院志略。凡四卷。

王朝式。字金如。山陰人。亦求如弟子也。嘗入證人社。念臺先生
主誠意。君守致知。曰。學不從良知入。必有誠非所誠之蔽。念臺
稱其志願大而骨力堅。所成就未可量。崇禎末。浙中大饑。金如
倡賑粟。全活甚眾。時天下大亂。將走四方。求奇傑士。謀治安民
守策。不果行。順治初卒。年三十有八。

刁蒙吉先生事略

子再濂

王餘佑

張滑

先生諱包字蒙古晚號用六居士直隸祁州人父克俊樂道好
施與學者稱貞惠先生先生生而穎異敦尚質行年二十有五
舉明天啟丁卯鄉試以古文鳴於京輔既再上春官不第遂棄
舉于業力以斯文爲己任於城隅開地爲齋曰潛室亭曰肥遯
日閉戶讀書其中無間寒暑學者宗焉執經之屨滿戶外甲申
國變設莊烈愍皇帝主於所居之順積樓服斬衰朝夕哭臨如
禮僞命敦趣先生以死拒幾及於難會賊敗得解入國朝途
不仕日取四子五經及宋元以來諸儒書反覆尋究積二十年
不勒其學以謹言行爲要以程朱爲宗旨嘗謂君子守身之道

三曰言語不苟曰取與不苟曰出處不苟尤篤好梁谿高忠憲之書曰不讀此幾虛過一生遂置主奉之如事貞惠禮偶有過舉必展謁悔謝曰某不肖甚愧吾父師不可爲子不可爲人其勇於自克如此先是貞惠卒三日勺水不入口母哭慰之始勉進一溢米鬢髮盡白杖而後起喪祭一準禮經既葬廬於中庭簷下三年不飲酒食肉不入內室每朔望忌辰悲號感行路年六十有七以居母憂毀悴致不起將卒時肅衣冠起坐命告辭貞惠及忠憲主問家事不答徐曰吾胸中無一事行矣遂瞑者私諡文孝先生生平木訥似不能言及大義所在則正色而談上下皆傾聽州有大事不能決者必待先生一言爲斷明季

流賊犯州城。先生毀家倡眾。誓固守。城得不破。時有二璫主兵事。探卒報賊勢張甚。二璫怒其惑眾。將斬之。先生厲聲曰。必殺彼。請先殺包。乃止。二璫相謂曰。使若居官者。其不爲楊左乎。賊旣去。流民載道。設屋聚養之。病者給醫藥。全活尤多。有山左難婦七十餘人。擇老成家人護以歸。臨行八拜以重託。家人皆感泣竭力衛送。厯六府盡歸其家。尤篤於故舊。然諾不苟。與東林諸君子及魏尙書環極爲神交。冬以所得相質證。孫夏峯徵君遷蘇門道出。祁州先生畱講學於家者三月。每晨起誦易一周。輒垂簾靜坐以爲常。所著易酌十二卷。四書翼註十六卷。斯文正統十二卷。辨道錄八卷。潛室劄記二卷。用六集十二卷。先生

卒後無錫學者祀諸道南祠。子再濂字靜之。自爲諸生卽弛置科舉業。從父友五公山人王餘佑及顏習齋元游。手錄父遺書。又貳之以質四方之學者。平湖陸清獻公嘗與靜之書乞借鈔用六集斯文正統辨道錄諸書。靜之年逾六十復手錄付諸子。且誡之曰。昔蔚州魏公持節巡京畿。余以故人子獨被渥洽。鄰邑人遂簾金而請事。余掩耳走蓄。然若穢污之及吾體也。汝曹他日登仕籍。若以官富家。吾生不受其養。死不享其祭。惟先人遺書未刻者尙百餘萬言。必約身而次第布之。其後仲子承祖登康熙乙未進士。累官至江西布政使。果盡刻諸遺書行世。五公山人者字介祺。保定新城人也。父延善。邑諸生尙氣誼。嘗

明末散萬金產結客有子三長餘恪季餘嚴山人其仲也出嗣
世父建善令魯山會闖賊陷京師山人自魯山歸父率三子與
雄縣馬魯建義旗傳檄討賊時容城孫徵君奇逢亦起兵共恢
復雄新容三縣斬其僞官未幾賊敗大清師入山人父爲仇
家所陷執赴京三子將從餘恪以山人後世父不可死揮餘嚴
爲復仇計遂獨身赴難父子死燕市餘嚴歸率壯士入仇家殲
其老稚三十口無子遺名捕甚急會上官有知其枉者力爲解
乃免於是山人奉魯山公隱易州之五公山少勵志行嘗受業
於孫徵君學兵法國變後更從徵君講性命之學隱居教授不
求聞達薦紳先生遑遑構請登具安車幣迎受業從遊至數百

國朝今正書四卷二十一
人山人負文武才。教人以忠孝。務實學。嘗彙古人經世事爲居
諸編十卷。八陣圖一卷。萬勝車圖說一卷。兵民經略圖一卷。又
湧幢草三十卷。文集三十二卷。王崑繩李剛主讀其遺書。至撫
卷太息曰。此諸葛武鄉之流也。卒年七十。學者私謚文節先生。
山人與刁蒙吉先生爲石交。靜之遊其門最久。語詳尹少宰北
學編。

同時有磁州張先生者。名潛。字尙若。年十二爲諸生。順治己丑
進士壬辰。選庶吉士。與湯文正公共砥礪。爲聖賢之學。性至孝。
聞母病。卽乞養歸。躬侍湯藥。母病遂瘥。後連丁內外艱。哀毀骨
立。喪葬皆如禮。服闋赴補。適有詞林外轉之命。同人錯愕。君

怡然歸鉅戶。讀書窮究身心性命之理。萃古人格言。懿行以勉子弟。家居二十年。不妄交遊。惟與孫徵君往復論辨。無虛日。嘗曰。真學問。在行誼。若知而不行。猶弗知也。又曰。除忠孝倫常外。別無道學。其所得可知矣。年五十有八卒。著有滄甯集十卷。

謝約齋先生事略

朱之盛

甘京

章燾

黃采

黃熙

謝先生文游字秋水號約齋江西南豐人。生當明季。見天下方亂。慨然有出世志。遂棄諸生入廣昌之香山。閱佛書。一日午坐。忽如鳥飛出籠。游太虛中。自此神氣洒然異常時。既讀龍溪王氏書。服之。復讀王陽明書。自信益篤。遂與同邑李夢林邵睿明請陽明之學。會於新城之神童峯。有王聖瑞者。力攻陽明。先生與爭辯累日。爲所動。取羅整庵困知記讀之。始一意程朱。闢程山學舍於城西。名其堂曰尊洛。著大學中庸切己錄。及講義數十篇。發明張子主敬之旨。以爲爲學之要。畏天命一言盡之矣。聖人一生戰兢惕厲曰。顧諟天之明命。曰。上帝臨汝。無貳爾心。

曰。昊天旦明。出王游衍。無非畏天命之心法也。學者當常提此言。注目而視。惟此傾耳而聽。惟此稍有一念之私。急當痛悔。速自洗滌。以無犯帝天之怒。久之。人欲淨盡。上下同流。樂天境地。可得而臻也。時甯都易堂九子。星子。髻山。七子。俱以文章節槩名天下。而先生獨反己。闇修務求自得。其程山十則。亦以躬行實踐爲主。髻山宋之盛。過訪程山。遂約易堂魏禧。彭任。會講旬餘。於是諸子皆推讓程山。謂其篤躬行。識道本。同縣甘京。字健齋。與先生爲友。已而服之誠也。遂師之。康熙二十年。先生病。自爲墓志。卒年六十有七。所著又有初學先言。大臣法則。左傳濟變錄。詩文集諸書。

宋之盛字未有星子人。少孤。事兩兄如父。崇禎己卯。舉於鄉。應禮部試。不第。歸結廬磐山。足不入城市。以講學爲己任。其學以明道爲宗。識仁爲要。於二氏微言奧旨。皆能抉摘異同。非若世之闢異論者。舍精而攻其舛也。與約齋交最篤。晚讀胡敬齋居業錄。持敬之功益密。戊申五月卒。同邑有查小蘇者。亦弃諸生山居不出。年九十而終。

甘京字健齋。南豐人。初爲諸生。後柔舉子業。與同邑封濬曾曰都師事。謝約齋。值邑荒亂。特請免荒稅。蠲賦稅。賑饑平寇。鄉人賴之。濬曰。都均以學行爲鄉里所矜式。

章慥字仲實。南城人。明諸生。隱居華子岡。灌園養母。與程山論

學有針芥之投程山每心折焉好讀史衡論精審發前人所未
發著二十一史童觀集閱史偶談若干卷魏叔子稱其發微闡
幽大有功於後學

黃采字亮工南城人孩提時大父訓以小學近思錄及聖賢事
蹟輒忻然聽受稍長言動不苟師事程山篤志力學事父母純
孝繼母周得狂易疾扶持三十餘年如一日及卒亮工年邁矣
仍哀慟盡禮居家以小學家禮倡引後進風俗爲一變與弟
以學道相勸勉著有聖圖願學錄聖學彙編卒年八十有四子
湘丙午舉人官信豐教諭既歿豐人祠祀之

黃熙字維緝約齋同縣人順治中進士官臨川教諭乞養歸

父憂哀感行路。蔬食三年。母喪未葬。鄰不戒於火。延燎將及。維
緝撫棺。大慟。願身同燼。俄風返。火息。約齋於並。世人少許。可獨
引君爲入室弟子云。

沈甸華先生事略 姚宏任

沈先生字甸華。其後改名昀。字朗思。浙江仁和人。年十六。受知
黎學使元寬。時山陰劉忠正公講學蔽山。先生渡江往聽講。而
應先生潛齋和之。甲申之變。棄諸生。刻苦自厲。其學以誠敬爲
宗。以適於用爲主。而力排二氏。曰。其精者。傍吾儒。其異者。不可
一日容也。聞四方士有賢者。輒書其姓氏。冀得一見之。然不肯
妄交。於取與尤介。授徒自給。三旬九食。以爲常。嘗絕粒數日。取
階前馬蘭草食之。有聞之者。餽米數斗。不受。固請則固辭。時先
生餓甚。宛轉辭謝益困。遂仆於地。其人皇駭去。良久始甦。笑曰。
其意良可感。然適以困老夫耳。嘗展蔽山墓。徒步往來西陵里。

中子弟習知先生清節。亦有好事者。謀繼粟肉。卒不敢前。以先生必不受也。潛齋嘆曰。生平於辭受一節。自謂不苟。然視沈先生猶媿之。以末世喪禮。不講輯士喪禮說。薈萃先儒之論。定其可行者。以授弟子。陸寅又輯四子略。五子要言。家法論。升降編。言行錄。居求編。皆粹然儒者之言。戴山身後。弟子爭其宗旨。名有煩言。先生曰。道在躬行。但騰口說。非先師所望於吾曹也。疾革。門人問曰。夫子今日何如。先生曰。心中無一物。惟知誠敬而已。卒年六十有三。無以爲殮。潛齋經紀其喪。不知所爲。涕泣不食。或問之。則曰。吾不敢輕受。賻綈以玷先生也。潛齋弟子桃敬恆趨問曰。如某可以殮先生乎。潛齋曰。子篤行。沈先生夙所許。

殆可也。於是姚生遂殮先生葬之湖上。子二毅中純中皆承家學。敬恆名宏在錢塘人少孤母賢婦也。敬恆不應科舉隱市廛其母偶見敬恆質絲銀色下劣愠甚曰汝亦爲此惡行乎。敬恆長跪謝願得改行乃受學。應先生曰誦大學一過一言一行服膺師說遇事必歸於忠厚。潛齋不輕受人物惟敬恆之餽不辭曰吾知其非不義中來也。然敬恆不敢多有所將每時其乏而致之終其身不倦。潛齋歎敬恆執喪如古師弟子之禮。姚江黃先生勝木於人鮮可意者獨許敬恆曰是獨行傳字人也。晚年以非罪陷縲紲憲使慮囚入獄敬恆方朗誦大學憲使異之入其室案上皆程朱書也與之坐語大驚即日釋之。然敬恆卒以

貧死平生但事躬行不著書故鮮知者

應潛齋先生事略

凌嘉印

沈士則

秦雲枚

潛齋先生姓應氏諱撫謙字嗣寅仁利人也父尙倫故孝子先生生而有文在手爲八卦左耳重輪右目重瞳少卽以斯道爲己任偕同志虔饒民張伏生蔣興恆爲狷社取有所不爲也最後交沈朗思尤稱莫逆母病服勤數年母憐之曰吾爲若娶婦以助若先生終不肯入私室母卒除喪始成禮於遺經皆實踐而力行之終身無疾言遽色每倦而休則端坐瞑目寤則遊息徐行所居僅足蔽風雨簞瓢屢空恬如也一日見梁上白蛇墮地曰此兵象也奉親逃之山中旣遭喪亂自以故國諸生絕志進取益盡力著書康熙戊午謁學李公天馥項公景襄以博學

鴻儒薦先生舉牀以告有司曰某非敢卻聘實病不能行耳或
舉泰山孫明復嘗從石介請以成丞相之賢謂不必果於卻薦
先生曰我不能以我之不可學明復之可乃免徵范忠貞公承
謨繼撫浙又欲薦之先生遂稱廢疾海甯令許西山請主講席
造廬者再不見既而曰是非君子中庸之道也扁舟報謁許大
喜曰應先生其許我乎先生遂巡對曰使君學道但從事於愛
人足矣彼口說者適足以長客氣也許嘿然不怡既出先生解
維疾行曰使君好事必有束帛之將拒之且益其慍受之則非
心所安也杭州守稽君宗孟數式廬欲有所贈囑囑未果及見
所作旡悶先生傳乃不敢言後以志局請先生辭之則請下榻

郡齋數日以請益先生。但一報謁而已。同里姜御史國南視議歸於故舊。皆有餽嘗。再致先生不受。偶遇諸塗。方盛暑。先生衣木棉衣。蕉萃躑躅。御史歸。投以越葛二端。曰：雅知先生不受人絲粟。然是茭茭者。非自盜泉來也。先生謝曰：笥尚有絺綌。昨偶感寒。欲其汗耳。竟還之。先生坐臥小樓中。一几一榻。書冊外無長物。弟子甚多。因以樓上樓下爲差。如馬融例。里中一少年使酒。忽扣門求聽講。先生許之。居三日。不勝拘苦。去使酒如故。偶醉持刀欲擊人。洵洵莫能阻。忽有人曰：應先生來。其人頓失魄。投刀垂手。汗浹背。先生撫之曰：一朝之忿。何至此。盍歸乎。其人俯首謝過去。先生卒於康熙二十六年。春秋六十有九。病革尚

手輯周忠毅公傳未竟而卒生平不喜陸王之學其論性論太極於程朱亦不盡同如論易謂孔子得易之乾老子得易之坤又謂伏羲之易乾在上以天爲主得之不得有命非人之所能爲也先天之事也後天之易作於文王離在上以心爲主妖壽不貳修身以俟之易凶爲吉所以立命也故所著周易集解皆獨具心得之言他若詩傳翼書傳拾遺春秋傳考禮樂彙編古樂書論孟拾遺學庸本義孝經辨定幼學蒙養編朱子集要潛齋集凡十餘種各有精義又撰教養全書四十一卷分選舉學校職官田賦水利國計漕運治河師役鹽法十考略仿文獻通考例而明代事實尤詳又有性理大中二十八卷其論次陽明

言行一卷附焉。平湖陸清獻公爲之序。謂當自爲一書。不當附性理後。因表而出之。曰王學考。清獻嘗兩會先生於武林。與論學術源流甚契。先生亦命二子訪清獻於西湖。寓次其卒也。清獻祭以文。略言先生高風峻節。可比許由。陶潛。然許雖高潔。文采無聞。陶之文采表著矣。而耽於麴蘖。不可以爲訓。惟先生閱覽博物。澹泊甯靜。許之所無。先生有之。陶之所有。先生無之。爲足高視古今。云先生歿後。河陽趙公士麟。儀封張公伯行。刻其遺集行世。門人凌嘉印。字文衡。沈士則。字志可。姚宏任。字敬恆。能傳其學。時錢塘有秦定叟先生者。諱雲爽。字開地。著紫陽大旨八卷。專爲糾陽明朱子晚年定論而作也。書分八門。曰朱子

初學曰論已發未發曰論涵養本源曰論居敬窮理曰論致知
格物曰論性曰論心曰論太極而陽明之論亦間載以資互證
焉

胡石莊先生事略

陳大章

劉夢鵬

胡先生承諾字君信號石莊湖北天門人明崇禎末舉於鄉入國朝隱居不仕臥天門巾栢間窮年誦讀書無所不窺而深自韜晦足不出庭戶生平無講學名而析理至精論事尤極平實著繹志六十一篇繹志者繹己所志也凡聖賢帝王名臣賢士與凡民之志業莫不兼綜條貫原本道德切近人情酌古而宜今爲有體有用之學其目曰志學曰明道曰立德曰養心曰修身曰言行曰成務曰辨惑曰聖王曰睿學曰至治曰治本曰任賢曰去邪曰大臣曰名臣曰諫諍曰功蹟曰吏治曰選舉曰朋黨曰辨姦曰教化曰愛養曰租稅曰雜賦曰導河曰勅法曰治

盜曰三禮曰古制曰建置曰禮祥曰兵略曰軍政曰武備曰名將曰興亡曰凡事曰立教曰論交曰人道曰出處曰取與曰慎動曰庸行曰父兄曰宗族曰夫婦曰祀先曰奉身曰養生曰經學曰史學曰著述曰文章曰雜說曰兼采曰尙論曰廣微曰自敘凡二十餘萬言先生自擬其書於徐幹中論顏之推家訓然其精粹奧衍非二書所及也李君念慈序稱先生尙有續書說若干卷與是書相表裏又稱有菊佳軒詩宏深博奧不屑爲新穎秀發以趨時尚今皆不傳楚北學者後有陳大章劉夢鵬大章字仲夔黃岡人康熙二十七年進士選庶吉士深於毛詩著詩傳名物集覽十二卷徵引既眾可資博覽夢鵬字雲翼蘄水

人乾隆十六年進士官饒陽知縣著春秋義解十二卷大旨推
本公穀謂公穀屬辭比事義不詭於儒者其斥左氏也持論甚
辨。

國朝先正事畧卷二十九 名儒

平江李元度次青集

李開章先生事畧

党成

陶世徵

李先生諱生光字開章山西絳州人未冠爲諸生聞辛聘君復元倡學河汾遂往受業質疑問難無虛日生平篤於躬行事親至孝聘君深重之甲申之變先生北向痛哭焚其青衿自號汾曲逸民構草堂日夕燕處其中讀書自得諸弟子羅列其下談經課藝外訓以二南大義程朱微言所成就者眾著有儒教辨正崇正黜邪編凡萬餘言衛道之力甚勇又著正氣猶存西山閣筆友于集諸書皆直寫胸臆以淺近語寓覺世牖民之意其

處子吟曰東鄰有處子。夙明烈女篇。字人尙未嫁。而乃失所天。
痛茲生命薄。守貞期自全。毀容絕膏沐。矢志窮益堅。愛人貴以
德。姑姊莫相憐。侃辭謝媒妁。何用口談議。是可以見先生之志
矣。同州党先生成字憲公。號冰壑。其學以朱子爲宗。以明理去
私爲本。生平不求人知。人卽知而樂道之終非其志也。州守前
後表宅里士大夫公舉純孝。舉實學。州守貫其租庸。先生皆若
罔聞知。魏敏果公屢遺書商學業。說士於太守袁公。禮幣式間。
敦請開講。范彪西先生曾揚之於觀察張公。郡守梁公。先生聞
之皆遜謝。意甚不懌。時以古狷者推之。其辨朱陸異同。謂論者
多以陸爲尊德性。朱爲道問學。此言殊未然。蓋朱子之道問學。

實以尊德性也。陸氏則自錮其德性矣。何尊之可云。陸子嘗曰：不求本根，馳心外物，理豈在於外物乎？此告子義外之學也。朱子曰：本心物理原無內外，以外物爲外者，是告子義外之學也。卽此數語，可以見二家之異同矣。若粗論其同，二家皆欲扶世教，皆欲崇天理，去私欲，其秉心似無大異者。而實究其學宗，則博文約禮者，孔顏之家法，屢見於論語。朱子得其正矣。陸氏乃言六經皆我注腳，又言不識一字，管取堂堂作大丈夫，豈不偏哉？先生之語氣和平，而辨論精當，類如此。又陶先生世徵字視庵，亦絳州人，與李闇、章克壑兩先生同學。平生願學孔子，嘗言一部論語皆孔子精神所流露也。至無行不與之語及諸弟

子極意摹擬贊揚之語較尋常答問尤爲親切從此想像其精神命脈之所存久之覺夫子之真面目躍然欲出恍若親承提命者然可謂極羹牆之慕矣

朱柏廬先生事畧

顧培
詰生

潘天成

湯之錫

金敞

王

朱先生用純字致一江蘇崑山人父集璜明季諸生貢太學

大兵下江東城陷不屈死先生慕王哀攀柏之義自號曰柏廬
隱居味道以諸生老其學確守程朱知行並進而一以主敬爲
程長洲徐昭法與先生友屢以書問學辨析甚至居平精神純
謐動止有常晨起謁家廟退卽莊誦孝經數手書其文敎學者
置義田修墓祭友愛諸弟白首無閒遇事變嶄然不撓自言看
得天理熟當機立應如離弦之矢更不疑議更不矜張行所無
事康熙十七年或欲以鴻博薦固辭乃免其後有司欲舉爲鄉
飲賓亦弗應有來學者必先授以小學近思錄繼進之以四子

書每歲孟春率諸弟子行釋奠先師禮禮畢講四子書進止肅恭誠意激發興起者甚眾已又患學者空言無實得復作輟講語反躬自責言尤痛切其論學未嘗爭持異同曰知所當知行所當行可矣他非所暇也二十七年卒年七十有二前殤之三曰設先人位強起拜於堂曰吾可告無罪於先人矣顧弟子曰學問在性命事業在忠孝勉之哉有愧訥集及大學中庸講義行於世所著治家格言尤膾炙人口云同時有顧昀滋者名培無錫人也少善病母憂其不壽命習長生家言頗得導引術年二十五從宜興湯先生之錡問業始幡然有志於學湯先生歿有弟子曰金敬先生築共學山居以延敬昕夕講習遵高子靜

坐法以整齊嚴肅爲入德之方默識未發之中久之遂篤信性善之旨動靜語默無非學矣晚歲四方來學者益眾春秋大會山居行復七舊規有請益者教以默識其大原實體諸倫物七日期畢釋奠於先師習禮歌詩歲以爲常張清恪撫吳時詣東林講學頗疑靜坐之說先生往復千言暢高子之旨其言甚辨清恪不能難也年七十有九卒

又潘先生天成字錫疇號鐵廬溧陽人寄籍桐城爲安慶府學生幼與父母避仇相失年十五乞食尋親往來徽甯萬山中行且哭每至一村持鼓大呼作鄉語觀者輒笑至江西界母金氏聞聲自巷中出遂相持哭迎父母歸傭販以養備極艱苦亦從

湯先生之錡遊稱高座弟子又請業於梅徵君文鼎遂爲續學之儒年七十四竟窮餓以死遺書鐵廬集五卷其門人荆溪許重炎傳其學謀葬之且刻其集得徵入四庫錫疇之學源出姚江以養心爲體以經世爲用出自寒門天性真摯品最高傑而精神堅苦足以維風俗而勵人心四庫書提要稱爲義理文章莫大乎是卒祀郡邑忠孝祠

之錡字世調至性純篤居親喪一循古禮就地寢苦事諸父如父於儒先書無不讀而以周子主靜之說爲宗以子臣弟友爲教當事延主東林延陵諸講席不就有詢朱陸異同者則曰顧力行何如耳多辨論何益其卒也整襟危坐而逝金徹字廓明

靖江人。好高。顧遺書。以聖人爲必可學。師事湯世調。長世調三歲。執禮甚恭。後居無錫。與同志靜坐讀書。興起者甚眾。

王喆生字醕叔。崑山人。相廬先生弟子也。康熙壬戌進士。官編修。授職七月。告養歸。絕意仕進。讀書敦行檢。望日重。兩任邑中。清丈田畝事。先後爲巡撫湯公斌。宋公犖所推重。表章前哲。扶持桑梓。皆不遺餘力。著懿言日錄。張清恪稱其精深博大。比之抑戒云。

劉崑石先生事略

姜國霖

法坤宏

劉先生名原深字崑石號直齋山東安邱人生五歲問身所從來父奇之十四歲而孤事母至孝遇難負母而逃卒免禍明末盜賊竊起先生與其仲兄率鄉人壘而守閉婦女一室中約戰敗則火之及賊薄壘鄉人多被剗死仲兄身中九矢鬪益力先生從之發數十矢矢盡仲兄麾之去先生大呼曰離兄一步非死所也卒斬首二獲馬六賊遁一鄉得全亂定經營土疆力耕致富已而盡推膏腴與仲兄分其餘爲長兄立後瞻其亡姊家大購經史閉關讀書初閱養生家言喜之既讀宋儒語錄乃篤信朱子之學反覆推究四十餘年於明學薛文清於本朝學

陸清獻其餘不以爲是也。嘗曰：學者居敬窮理二者皆法文王而已矣。小心翼翼，昭事上帝，居敬之功也。不識不知，順天之則，窮理之功也。又曰：讀書乃身上之用，而人以爲紙上之用；居官乃辛苦之時，而人以爲快樂之時；衰年正勤學之日，而人以爲養安之日；科第本消退之根，而人以爲長進之根；皆可嘆也。每五更起，講祠堂，退居一室，與諸弟子講論，常至夜分。月爲講會興起者甚眾，請於有司，建朱子祠東郊，春秋祀焉，以喪祭禮廢俗日儉，乃酌古今之宜，定爲品式，祭必嚴齋戒，浚事極虔。仲兄疾，顧天祈以身代。兄卒，七日中止三食，久之，一邑皆化於禮。又爲鄉人置義倉，煮粥以食饑人，嘗言：人與我一天而已。何畛域

之有焉。年八十二有疾。當祭朱子。強起拜於庭。悶絕良久始甦。康熙三十九年卒。撰讀書日記六卷。近思續錄四卷。冷語三卷。其冷語中。詆劉安世爲僉王等。於章惇。邢恕。則以其與伊川不協之故。而未讀宋史盡言集也。繼先生而起者。有濰縣姜雲一。膠州汪鏡野等。皆以學行稱。

雲一名國綵。少有至性。父遊京師。病。雲一往省。則已歿。無錢市棺。以敝衣一襲。裹父尸。身負之。乞食而還。族人醵金以葬。母善怒。怒則致疾。雲一百計解之。一日怒甚。雲一跪膝前。作小兒嬉戲狀。持母手。撻其面。母笑而罷。自是不復怒。時雲一年五十矣。師事昌樂周先生士宏。士宏有高致。嘗與雲一至莒。樂其山水。

家焉死卽葬於菖雲一築室其側家極貧七十外猶躬耕年饑率二日一食貌轉腴菖人恐其餓死聞於官而遺之粟居常肅衣冠謹言語竟日危坐無頽容人或非毀之至面誚夷然不爲動昌樂閭懷庭問雲一喜讀何書曰論語二十篇終身味之不盡也自言年四十始能不以貧富撓其心五十始能不以死生動其心云

鏡野姓法氏名坤宏曾祖若真康熙己未舉鴻博官布政使先生性恬靜不諧俗遂自號迂齋少讀先儒書未厭也旣得傳習錄大喜以爲如己意所出故其學以陽明爲宗以不自欺爲本間懷庭嘗辨之鏡野曰此無事口談也譬之飲食得其甘者果

其腹飫其精者澤其體徒謀謀然爲他人辨是非所謂含靈龜
觀朵頤也乾隆六年舉人官大理評事卒年八十有七著春秋
取義測及綱目要畧同時齊魯閒學者又有濰縣劉君以貴德
州梁君鴻嘉安邱張君貞益都李君文藻壽光王君允中彬彬
乎稱盛焉

白含貞先生事畧 党湛 王化泰 張承烈 馬嗣煜

白先生與彩字含貞號泊如陝西華州人出馮恭定公從吾之門明末與張太乙武陸海諸君同講學後所與游則同州党兩一王思若張敦庵馬立若蒲城王省庵諸君以道誼相切劇党兩一先生名湛字子澄嘗言人生須作天地閒第一等事爲天地閒第一等人故自號兩一王省庵先生名化泰篤志理學與党兩一爲至交互相砥礪同時有周先生澹園究心濂洛關閩書立身行己大體卓然與白党諸先生並推關中學者又武功張先生承烈字爾晉初喜任俠三變而畱心正學折節讀儒先書言動以之準繩尺寸毫髮不敢苟而同州馬先生嗣煜者字

元昭號二岑。以古學自任。通判山東權守武定州。敵兵來攻城。陷。死之。李二曲先生謂關學自馮恭定公以後。咸推二岑先生云。

施愚山先生事畧

愚山先生諱閏章字尙白安徽宣城人祖鴻猷明萬厯閒遊鄒忠介焦文端羅近溪三先生之門以理學顯稱中明先生父嘗篤孝友父喪三日水漿不入口杖不能起旣葬奉木主寢室出告反面如事生輯父遺草必跪書遇諱日白衣冠號泣終其身母病禱九華山神願減算延母壽母後竟以八十終而誓止三十有七家法嚴重始婚夕客強以酒謝弗勝父以爲忤客目攝之卽跼謝父遣去則退而跪於寢門漏三下父入見之引其手曰孺子執禮過矣弟嘗讀書陽羨會秋薦新穀與客會食烹池魚忽泣然曰吾弟出門時魚方二寸許今盈尺矣遂嗚咽廢箸

兄弟閒自爲知己。嘗恐年壽不齊。月下相抱哭。願世世爲兄弟。先生少孤。叔舉撫之成立。弱冠工制舉業。兼治詩古文辭。從沈徵君壽民遊。金壇周儀部鑣異其文。延之讀書其家。順治丙戌。舉於鄉。己丑。成進士。授刑部主事。

天子大婚禮成上

皇太后徽號。詔赦天下。公奉使廣西。徧遊嶺西諸山水。會永明王犯桂林。殺定南王。孔有德畧地而東。先生還至平樂。將嬰城共守。知府尹明廷曰。公使臣無嬰城理。揮之行。抵家。丁祖母艱。服除。補員外郎。引經斷獄。有疑。必反覆推求。曰。如是則生者死者兩無憾也。公餘與宋荔裳嚴顥。亭丁飛濤。張譙。明趙錦帆。

周宿來諸君相唱和號燕臺七子當是時

世祖方右文選尚書郎資望深者御試高等乃得補授提學使者先生名第一擢山東提學僉事教士以通經學古爲先論文崇雅黜浮風氣一變嘗葺孟廟閔子廟伏生祠墓及孫明復不守道二祠其初至濟南也夢古衣冠丈夫揖而若有所屬者三次日遊藥山尋李滄溟墓墓蕪沒不封樹一豐碑無字仆草閒恍然悟夢境卽自爲文勒其上其應御試也大學士劉公正宗實薦之後屬其同年孤子章以文不入格黜劉公語人曰學臣不受請託獨施君耳秩滿遷湖西道參議時軍餉嚴迫屬邑多逋賦追呼急輒相聚爲盜先生作勸民急公歌召父老垂

涕泣諭之相率輸租恐後吉水有巨室依險自保邑令執之以
叛聞先生察其枉令輸賦而遣之因徧歷穹山邃谷閒作彈子
嶺大阮歎竹源阮諸篇以告諸長吏讀者爲流涕曰施使君今
之元道州也臨江城圯築輒潰先生禱於神越日城成會歲旱
禱雨徒跣走南郭門外伏雲壇下呼天痛哭俄一人發狂叫號
云某日雨及期雨果大至地多虎暴白晝噬人爲文告城隍神
期三日得虎次日午郊外民居兩婦方舂虎突至以杵擲之
應手斃患自是息暇日修景賢鷺洲兩書院祀王文成鄒忠介
羅文恭日與諸生講學其中時屏騶從往來金牛石蓮諸洞訪
前賢遺跡遊宴賦詩耆舊逸民皆出就之偶會期有具牒請質

者先生曰此講習地聽訟有官署令就坐講長幼有序極陳兄弟之恩且曰某少孤終鮮兄弟見友恭者固欣然慕卽見鬪牆者亦心動以謂彼尙有同氣或猶可轉乖爲和也言下涕泣忽末坐二客相持大慟各出袖中牒牘之蓋兄弟訟產十年不決者曰吾小人今遇聖賢而不洗心者非人也遂讓所爭產爲祀田居亡何以裁缺歸士民醵金建龍岡書院畱先生講學三日乃去父老遮道不可輿步而登舟燕香哭送者數千人所乘官舟輕不能渡湖民爭買石膏填之旣渡乏食賣舟而歸時叔譽年七十矣先生事叔如父有終焉之志部檄至引疾力辭里居十年詔舉博學鴻儒相國李公蔚杜公立德馮公溥交薦之

先生固辭叔父強之出。召試授侍講纂修明史。是年叔譽卒。先生哀毀成疾。擬奔喪格於例居平。忽忽不樂。逾年典試河南。稱得士張公伯行其一也。請假省墓先就叔譽葬所哭奠三宿。然後歸。又二年轉侍讀。先生素以文學飭吏治。自入史館當著作之任。朝士大夫求碑版詩歌者趾錯於戶。四方名士負笈問業無虛日。一一應之。不少倦。平日口期期若不能言。及談忠孝奇節輒抵掌奮發慷慨流涕不能已。遇羈人才士矢志無聊多方爲之延譽。士以此益歸其門。一日退朝端坐草馮恭定傳。自午迄酉移案就簷隙草罷不能起。左右掖之若形存者。時子彥瀄以咯血歸。彥恪亦南遷就試。妾徐氏刲股和藥以進焚香額。

天曰主翁畜道德名滿天下縱必不起亦請延待其子一訣使
竟死妾婦手目不瞑矣因長號三晝夜一夕白光如匹練自屋
上落奇香起榻前先生忽甦康熙二十二年三月十七日事也
彥恪尋奔侍先是庚戌春彥恪夢神人按籍言司天下壽算叩
先生壽以七十有八告至是從容言之先生遽曰吾少失母大
母吳太恭人鞠之後太恭人疾不受治吾齋沐禱城隍神願減
一紀延其壽人無知者次日同學楊薦臣來曰某夢入城隍廟
見子跪階下手一紙哀請聞神曰準達天曹矣子豈有所求乎
吾悚然不敢應是日太恭人竟不藥愈又十二年乃終以若所
聞減一紀則今秋正限盡時也閏六月果卒年六十有六先生

官湖西時叔譽往視先生跪迎之有不悅必冠服跪終日俟其
解乃起自中明公厯世創義田不就先生積俸置田二百畝贍
其族葺里中同仁館又修復依仁齋於白門以推闡中明公理
學之緒蒙師劉伯陽無子葬之中明墓旁歲時分祀焉生平以
友朋爲性命高涇邢孟貞江甯顧與治宛平楊商賢皆文字交
也邢顧歿皆經理其喪刻其遺集顧無子邢止一孫以屬高涇
令買出贍之商賢客死礪石志其墓嘗與同邑吳某赴禮部試
吳有老母下第先生已在第中相持泣一若與之俱擯者同年
生李頌官粵東卒無子妻女流落東萊爲賁所迫將鬻女先生
理其責而資送之後十五年遊茗雪閒廣陵宗鶴問過訪詢之

則頽女夫也。大喜偕至其家。李泣拜至不能仰視。平樂守尹君娶城死。其子三十未娶。先生爲娶之。嘗曰。吾去平樂時。放舟中流。迴望尹君。送予。還其前後伍伯。忽獸走獨一。舉眇眇隨決。皆殞。至今思之。猶絕痛也。應召試時。入都不通一刺於朝貴。或尤之。先生笑謝曰。吾豈矯情哉。所懼者官高一級。卽人品減一等耳。先生嘗云。終日不見己過。便絕聖賢之路。終日喜言人過。便傷天地之和。時以爲名言。所著有學餘集八十卷。年譜四卷。試院冰淵一卷。詩話雜著各二卷。青原志畧補輯十三卷。行於世。孫念曾。乾隆丙辰召試博學鴻詞科。

曹厚庵先生事畧

張貞生

先生姓曹氏名本榮字欣木又字厚庵湖北黃岡人幼讀陽明書好之探索至廢寢食常屏跡山中夜半月出坐蓬旦怡然有得順治六年成進士選庶吉士謁館師胡此庵講明善之旨先生曰何其言之似王文成也因與往復討論此庵曰予所言皆先儒之言非心悟獨得者於子何益先生由是益究心每深思不得輒泣下閤一年豁然大悟趨質此庵此庵遙望見先生大喜曰今大有得矣八年授秘書院編修應詔上聖學疏千餘言其畧云今

皇上得二帝三王之統則當以二帝三王之學爲學誠宜開張

聖聽修德勤學。舉四書五經及通鑑中有裨身心要務。治平大業者。內則深宮燕閒。朝夕討論。外則經筵進講。敷對詳明。從此設誠致行。君德既修。自能祈天永命。有詔嘉納。十年擢贊善。尋遷司業。刊白鹿洞學規。以教諸生。明年轉中允。又明年。

世祖拔詞臣中品端學殖者充日講官。先生與焉。十三年。晉秘書院侍講。轉左庶子兼侍讀。日侍講幄。論辨經義。問無不對。對無不盡。尋與傅公以漸同奉詔撰易經通注九卷。鏤鑄。眾說詞理簡明。爲說易家之主。臬先生素善病。

上遣御醫診視。御筆仿巨然畫。賜之。

世祖一日讀孟子至人知之亦囂囂顧先生曰自得無欲哉是

當之矣十四年主順天鄉試充經筵講官坐失察同考官不法事鑄五級明年九月

上諭吏部曰曹本榮侍講幄日久著有勤勞其令復原級十八年補翰林院侍講學士改國史院侍讀學士康熙四年以疾請回籍遷葬卒於揚州年四十有四先生家素貧在京師居黃岡會館布袍菜食家人不勝其苦有同年生從容謂曰今詞臣供職一兩年卽假歸盛冠蓋出入烜赫爲親族交遊光寵予何自苦若是先生曰吾將以爲學也學貴澹泊明志使吾學纔有成得致吾君於堯舜飢困非所惜也同年生譚鳳禎卒於京邸先生爲之治喪其妾生子令室中婢乳之後成立魏敏果公爲賦

古人交行其學初從陽明入直悟心原繼加以踐履篤實之功著五大儒語錄及周張精義王羅擇編居要錄切問錄諸書其論次五大儒以程朱薛與陸王並行其卒也蘇門孫徵君慟惜之謂商周之際道在箕子宋元之際道在許子明 清之際道在曹子其言不可易也病革時門下士計東在側猶諠語以窮理盡性之學且曰當知此道極簡易勿過求之苦且難殉之曰起就沐浴正衣冠視日影方中危坐而逝行李蕭然囊無十金積賴門人賻贈歸其喪計東嘗問先生曰今天下幸而前有朱子後有王陽明使心性之學大明於世倘二子不能先後生則誰爲天地必不可無者先生悚然厲聲曰甯無王陽明不可

無朱子其所得可知矣。子宜溥由廕生舉博學鴻詞科。召試授檢討。同時有張簣山者亦官學士。與先生同以理學名。

簣山名貞生一字幹臣。江西廬陵人。順治十五年進士。累官侍講學士。爲司業時。刻鄒南皋宋儒語畧。頗主良知之說。後與魏敏果熊文端往來講學。乃一宗考亭。康熙九年。議遣大臣巡方。幹臣言。察吏安民。當責成督撫。大臣巡方。徒擾百姓。無益。坐出位。言事降二秩。尋乞病歸。然卒罷巡方之令。居京邸。蓬蒿滿徑。突無炊烟。瀕行不能具裝。故人餽贐皆弗受。家居構我師祠。又捐宅爲誠意書院。學宗朱子。一以慎獨主敬爲歸。嘗大書座右曰。最危是人禽之界。喫緊在義利一關。著有庸書二十卷。聖門

戒律八條及玉山遺響集十四年以原官起補卒年五十有三
嘗言學問經濟本非兩途然經濟有從學問來者學顏子之學
卽志伊尹之志是也亦有不從學問來者則爲驕吝爲器小爲
執拗甚至爲奸險非不自謂有爲有猷其實毒蒼生而誤國是
者卽此自命經濟之人也論者以爲名言于世坤能傳其學著
有恥言集

耿逸庵先生事畧 張 沐

先生名介字介石號逸庵河南登封人性清鯁篤於踐履順治八年進士由檢討出爲福建巡海道時海疆未靖築石城以備盜興廉去貪革除苛政恩信大行康熙元年轉江西湖東道因裁缺改直隸大名道時方嚴旂下逃奴之令坐窩逃就繫者纍纍在官期年清三百餘獄不辜累無辜民感之母憂歸不復出詣蘇門受業於孫徵君執弟子禮甚堅篤志躬行以倡明絕學爲己任與雅州湯潛菴上蔡張仲誠先生往復辨難興復嵩陽書院士習蒸蒸丕變二十五年以潛菴薦授少詹事入直上書房輔導皇太子會潛菴爲執政所嫉掎摭萬端先生引疾乞

休。詹事尹泰等劾先生詐疾。因以傾潛菴。尋予假歸。復主書院。日孜孜以講學爲事。潛菴疏稱其賦質剛方。踐履篤實。服官冰蘖。自矢。居家淡泊。自甘。蓋實錄也。所著有理學正經。性理要旨。中州道學編。孝經易知。敬恕堂存稿。仲誠姓張氏。名沐。號起菴。順治十五年進士。授內黃知縣。其治以躬行爲本。重農桑。敦教化。裁革苛斂。與民休息。令家書爲善。最樂於明注六諭。敷言反覆。譬曉。雖婦孺莫不憬然。易慮也。胡望集諸生。會講明倫堂。俾自奮於學。居五年。坐事免。以薦起知四川資縣。其治如內黃。屢舉廉吏。乞病歸。從孫徵君遊。與湯潛菴耿逸菴二先生往來講學。初潛菴自夏峯道內黃。與先生語大悅。遺書徵君。稱其任道。

甚勇求道甚切。及以薦入京。潛菴與人書。又稱仲誠腳踏實地。其學以主敬爲功。治易有心得。當代真儒也。其推重如此。尋主遊梁書院。晚年闢白龜園。草宇土壁。以受四方學者。興起者甚眾。學者稱上蔡夫子。著圖書秘典。溯流史學鈔一隅。解諸書。

汪星溪先生事畧

汪先生佑字啟我號星溪安徽休甯人十歲讀四子書至孔子作春秋孟子閑聖道章夜屢夢天日晦冥舉手捫之覺而詢諸師師曰此皆聖道之榛莽楊墨之流禍汝今所讀正人心息邪說孟子良爲此也稍長慕劉因氏所評周程張邵朱呂之說謂幸生朱子之鄉遂願私淑以終身焉篤好小學近思錄遵朱子半日靜坐半日讀書法明崇禎末寇事棘先生憂之著平寇十六策思效伊川詣闕上書故事以時不可爲不果上遂隱居事親學日進友人楊景陶邀赴還古書院會講先生見所講多雜陸王之說乃與同人發明程朱正學會汪君覺斯倡復天泉書

院講會。先生見汪君所學甚正。遂授以陳清瀾學部通辨。互相
考究。嘗曰。有善無惡。性之體。有善有惡。情之動。知善知惡爲良。
知爲善去惡爲良能。擴而充之。盡其才。窮理盡性。至於命。斯爲
大中至正。斯爲至誠无妄。乃陽明宗旨。反以無善無惡爲心之
體。何耶。顧端文有言。釋氏二藏十三部五千四百八十卷。一言
以蔽之曰。無善無惡。其害可勝言哉。紫陽書院。正吾黨講學明
道之壇坫也。乃與汪正叔江衛道。汪月巖胡匏更吳敬庵汪石
樵吳慎先汪括齋朱濟臣陳書始謝兼善諸君。振興紫陽大會。
訂六邑同人。歲以朱子生日。行釋菜禮。講學三日。一遵白鹿洞
遺規。嚴斥歧趨。循正軌。此外若休城四孟會。白嶽聖誕會。各邑

塾月講會皆不憚遠涉。應期必赴。蓋先生自遜世以後。視富貴如浮雲。避勢利如蛇蝎。格格不諸於俗者四十年。而一時同人皆知崇尚正學。則爲功多矣。所著有詩傳闡要。易傳闡要。禮記問答禮記訂詁。大樂嘉成。四書闡要。四書講錄。五子近思錄。四子近思翼。明儒崇正錄。明儒通考。明儒性理彙編。讀史筆記。星溪文集。日記家訓。諸書而尤邃者。明儒通考一書。擇精而語詳。高彙旃先生千里借鈔。以謂得見此書。雖瞑目而無憾云。子鑑安貧讀書。能嗣其家學。